

Inatsisartut Naalackersuisullu pillugit Inatsisartut inatsisaata allanngortinneqarneranik Inatsisartut inatsisaat nr. 18, 20. november 2006-imeersoq.(Aktieselskabit Namminersornerullutik Oqartussanit tamakkiisumik ilaannakuusumilluunniit pigineqartut pillugit Inatsisartut paasitinneqarsinnaatitaanerat) Atuussimasoq (Historisk)

§ 1.

Inatsisartut Naalackersuisullu pillugit Inatsisartut inatsisaanni nr. 11, 20. oktober 1988-imeersumi, kingullermik Inatsisartut inatsisaatigut nr. 18, 11. december 2003-imeersukkut allanngortinneqartumi, makku allanngortinneqassapput:

1. § 16-ip kingorna ilanngunneqassapput:

" § 16 a. Aktiateqarluni ingerlatseqatigiiffinni Namminersornerullutik Oqartussanit tamakkiisumik ilaannakuusumilluunniit pigineqartuni aningaasaliinissamik qularnaveeqqusiinissamilluunniit allatulluunniit aningaasatigut iluaqusiinissamik pingaarutilinnik siunnersuutiniq qinnuteqaatinilluunniit ataatsimiititaliap suliarinninnerani atugassatut ingerlatseqatigiiffimmit pineqartumit, pisariaqarpat aktieselskabit pillugit inatsimmi ingerlatseqatigiiffiilluunniit malittarisassaanni periarfissiissutaasut atornerisigut, paasissutissanik erseqqinnerusumik nalunaakkanik pissarsiniarnissamik Aningaasaqarnermut Ataatsimiititaliap Naalackersuisut peqqusinnaavai. Ataatsimiititaliap kaammattuineratigut paasissutissat Naalackersuisut pissarsiatik kinguarsaanertaqanngitsumik ataatsimiititaliamut atugassanngortissavaat.

Imm. 2. Paasissutissat ataatsimiititaliamit pisariaqartutut nalilerneqartut tigungissaata tungaanut siunnersuutiniq qinnuteqaatinilluunniit imm. 1-imi taaneqartunik suliarinninnini ataatsimiititaliap unitsikkallarsinnaavaa.

Imm. 3. Paasissutissat isertuussassatut tunniunneqarsimappata ataatsimiititaliami ilaasortat allallu ataatsimiititaliap oqaluserinninnerani najuuttut imm. 1 naapertorlugu ataatsimiititaliami ilisimalikkaminnik isertuussinissaminnut pisussaataaapput. Nutaatut ilaasortanngortoq kinaluunniit pisussaaffimmik tamatuminnga eqquutsitsinissamik uppernarsaalluni atsiusaaq."

2. § 17-ip kingorna ilanngunneqassapput:

" § 17 a. Kalaallit Nunaanni Namminersornerullutik Oqartussat aktiaatilitut soqutigisaannik Naalackersuisut isumaginninnerannik Landskarsip Naatsorsuutaasa Kukkunersiorneqartarnerannut Ataatsimiititaliaq aamma nakkutilliisuvoq.

Imm. 2. Aktieselskabit Namminersornerullutik Oqartussanit tamakkiisumik ilaannakuusumilluunniit pigineqartut ingerlatsivigineqarneranni aningaasaqarnikkut innimigisassanik Naalackersuisut naleqquttumik qulakkeerinninniarsimanersut ataatsimiititaliap imm. 1 naapertorlugu nakkutilliinerminut ilaatillugu nalilersorinnaavaa.

Imm. 3. Aktieselskabini Namminersornerullutik Oqartussanit tamakkiisumik ilaannakuusumilluunniit pigineqartuni Kalaallit Nunaanni Namminersornerullutik Oqartussat aktiaatilitut soqutigisaannik ataatsimiititaliap nakkutilliinermini atugassatut ingerlatseqatigiiffimmit, pisariaqarpat aktieselskabit

pillugit inatsimmi ingerlatseqatigiiffiulluunniit malittarisassaani periarfissiissutaasut atonerisigut, paasissutissanik erseqqinnerusumik nalunaakkanik pissarsiniarnissamik Naalackersuisut peqqusinnaavai. Ataatsimiititaliap kaammattuineratigut paasissutissat Naalackersuisut pissarsiatik kinguarsaanertaqanngitsumik ataatsimiititaliamut atugasiissutigissavaat.

Imm. 4. Ataatsimiititaliami ilaasortaq kinaluunniit aalajangiiffigisassatut siunnersuummik Naalackersuisut aalajangiiffigisassaannik imm. 2 3-lu naapertorlugit saqqummiussisinnaavoq. Inatsisartunut ilaasortat ikinnerpaamik 2/5-liisa siunnersuut isumaqatigalugu taasippata siunnersuut akuersissutigineqartutut isigineqassaaq. Siunnersuummut allanguutissatut siunnersuummik saqqummiussisoqarsinnaanngilaq.

Imm. 5. Paasissutissat isertuussassatut tunniunneqarsimappata ataatsimiititaliami ilaasortat allallu ataatsimiititaliap oqaluuserinninnerani najuuttut imm. 1 naapertorlugu ataatsimiititaliami ilisimalikkaminnik isertuussinissaminnut pisussaatitaapput. Nutaatut ilaasortanngortoq kinaluunniit pisussaaffimmik tamatumingga eqquutsinissamik uppernarsaalluni atsiussaaq. Pissutsinik Kalaallit Nunaanni Namminersornerullutik Oqartussat aktiaatillittut soqutigisaannut tunngassunik Inatsisartut ilisimatissuteqarfigineqarnissaat ataatsimiititaliap pisariaqartutut isigiguniuk ataatsimiititaliaq immikkuullarissumik isumaliutissiissuteqassaaq. Isumaliutissiissut paasissutissanik isertuussassanik imaqarpat matoqqasumik ataatsimiinnermi oqaluuserineqassaaq."

§ 2.

Inatsisartut inatsisaat atuutilissaaq ulloq 1. januar 2007.

Namminersornerullutik Oqartussat ulloq 20. november 2006

Hans Enoksen

/

Kaj Kleist